

Minister Michelle Hooyboer-Winklaar y SPO:

Orguyoso di graduadonan



ORANJESTAD- Scol Practico pa Ofishi (SPO) Santa Cruz a bira un realidad e aña escolar 2014/2015 y den su prome salida e hobennan a saca cara di nan scol cu un porcentahe di graduado impresionante di 84%. Minister di Enseñansa, Michelle Hooyboer-Winklaar a participa cu hopi satisfaccion y alegria na e ceremonia di graduacion di e 48 alumnonan den ballroom di Radisson Resort diamars anochi.

Scol Practico pa Ofishi ta loke antes tabata conoci como EPB Aspiranten Opleiding. Tin dos scol di e tipo aki na Aruba, uno na Santa Cruz y uno na Savaneta, unda cu e hobennan ta ricibi enseñansa practico den diferente ramo cu ta habri caminda pa nan entrada directo den mercado laboral of pa nan sigui studia.

Den e sala tabata reina un ambiente alegre, caminda cu e graduadonan di cinco diferente unidad/ramo y

nan sernan keru a celebra den grandi e ocasion special aki. Minister Hooyboer-Winklaar a splica cu e grupo aki ta e prome di dos grupo cu lo celebra nan graduacion y cu e ta sumamente contento cu un porcentahe di graduado asina bunita.

E mandatario a splica cu e grupo di hoben aki pa diferente motibo y factor, sea ta circunstancianan personal of circunstancianan pafo di nan control of alcance, tabatin mester di un diferente tipo di scol y p'esey a distingui e scol aki for di otro, ofreciendo un curriculum mas practico, cu por cierto ta uno hopi interesante y varia tambe.

Minister Hooyboer-Winklaar a bisa cu entre otro ta factornan di nan bida diario of bida familiar a pone cu nan no por haci cierto cosnan den e parti academico y den e caso di otro, nan ta e sistema di enseñansa mes a faya nan, pero a pesar di tur cos nan tabatin gana di sigui studia y e resultadonan y nan determinacion pa caba un curso ta impresionante.

Minister Hooyboer-Winklaar a felicita e graduadonan, nan mayornan y otro sernan keru cu a compania nan den e trayectorio na SPO y tabatin palabranan di elogio pa e maestronan y mentornan cu a traha asina duro pa yuda e hobennan yega nan metanan. E Minister a remarca cu e ta-



bata hopi contento pa tende cu algun di e studiantenan lo sigui studia, pero cu tambe tabatin algun cu a haci asina un bon impresion durante di nan stage y a cera cu e hendenan di e compania unda cu

nan a haci nan stage y cu nan lo subi mercado laboral di biaha despues di nan graduacion na e companianan aki.

Minister Michelle Hooyboer-Winklaar ta desea e

graduadonan hopi exito cu nan plannan y ta manda un mensahe pa e studiantenan di SPO cu no a gradua e aña aki, cu e ta spera di mira nan bek na scol trahando riba nan diploma pa gradua na 2016. □